

Dumonda Pfäffli concernent las entradas da taglia e la gulivaziun da las resursas da las 11 vischnancas da l'Engiadin'Ota

Ils 31 da december 2024 avevan las 11 vischnancas da l'Engiadin'Ota 16 178 abitantas ed abitants. Quai eran 8,06 pertschient da la populaziun permanenta dal chantun Grischun.

En il sistem da la gulivaziun da finanzas en il chantun Grischun èn tut las vischnancas da l'Engiadin'Ota vischnancas donaturas tar la gulivaziun da las resursas. Il 2023 han tut las vischnancas donaturas pajà 21 102 682 francs en la gulivaziun da las resursas. Da questa summa derivavan 12 653 168 francs (59,96%) da l'Engiadin'Ota. Il 2024 ha la summa totala importà 22 957 697 francs. A quella summa han las 11 vischnancas da l'Engiadin'Ota contribuì 14 733 806 francs (64,17%). Ed il 2025 han las vischnancas donaturas pajà tut en tut 27 024 994 francs al chantun per la gulivaziun da las resursas. 18 823 455 francs (69,65%) da questa summa èn vegnids da l'Engiadin'Ota en direcziun da la cassa chantunala.

Sco facit da questas cifras pon ins constatar, che var 8 pertschient da las abitantas e dals abitants dal Grischun surpiglian ina pli e pli gronda cumpart da las contribuziuns da finanziaziun da las vischnancas en la gulivaziun da las resursas – e quai tant procentualmain sco er areguard l'import.

En quest connex sto in ulteriur aspect vegnir contemplà pli detagliadamain. Per il chantun Grischun èn numnadamain las taglias sin las entradas da las persunas natiralas, las taglias sin la facultad da las persunas natiralas, las taglias sin las expensas da persunas estras e las taglias sin il gudogn tras la vendita da bains immobigliars d'importanza decisiva. Ils onns 2023 fin 2025 importava lur contribuziun cumulada var 80 pertschient da las entradas da taglia dal chantun Grischun. Ins dastga supponer ch'ina cumpart substanziala da questas entradas da taglia vegn generada en las 11 vischnancas da l'Engiadin'Ota.

En vista a quests fatgs tschentan las sutsegnadras ed ils sutsegnaders las suandantas dumondas a la Regenza:

1. Quant gronda è la cumpart da la taglia sin las entradas, sin la facultad, sin las expensas e sin il gudogn tras la vendita da bains immobigliars che deriva da las 11 vischnancas da l'Engiadin'Ota?
2. Exista en connex cun la gulivaziun da las resursas en la gulivaziun da finanzas chantunala sco er probablmain tar las entradas da taglia chantunalas in'analisa da las ristgas dal chantun che sa fatschenta cun la dependenza pli e pli gronda d'ina singula regiun?
3. Cun tge strategia, ch'è principalmain er en l'interess dal chantun Grischun, vegnan garantids a lunga vista il substrat da taglia e las entradas da taglia respectivas generadas da las 11 vischnancas da l'Engiadin'Ota?
4. Tge influenza han las ultimas decisiuns da la politica fiscala da las votantas e dals votants (aboliziun da la valur da l'atgna locaziun, introducziun da l'imposiziun da taglia individuala) sin l'analisa da ristgas e sin la strategia dumandadas en questa intervenziun?

Cuira, ils 17 da zercladur 2026

Pfäffli, Binkert, Metzger, Berthod, Berweger, Caluori, Claus, Della Cà, Gansner, Jochum, Kienz, Lehner, Michael (Castasegna), Nicolay, Preisig, Schneider